



14. august 2007

Inatsisartut Forretningsorden-ianni § 36 imm. 1 tunngavigalugulu Naalakkersuisunut apeqquteqaatinik makkunanga saqqummiussaqaarniarpunga:

**Namminersornerullutik Oqartussat aktieselskabiutaasa pinngitsooratik Erhvervs- & Selskabstyrelemut paasissutissanik tunniussinissamut piunasaqaatinik malinninnissaat kiisalu selskab-inut tunngatillugu inatsisit naapertorlugit piunasaqaatinik allanik malinninnissaat pillugu Naalakkersuisunut apeqquteqaatit.**

(Inatsisartunut ilaasortaq Lene Knüppel, Demokraatit)

Ukioq manna 7. august-imi AG-mi saqqummersumi ilanngussami atuarneqarsinnaavoq Namminersornerullutik Oqartussat suliffeqarfiutaasa, aktieselskabit, ilaasa selskabenut tunngatillugu inatsimmi atuuttumi piunasaqaatigineqartut, tassa Erhvervs- & Selskabsstyrelemut paasissutissanik tunniussaqaarnissamik piunasaqaatit malinngikkaat.

Pinngitsoorani paasissutissanik tunniussinissamut piunasaqaateqarnerup pingaarutilimmik siunertaraa inuit kikkulluunniit naalagaaffiup kiisalu Namminersornerullutik Oqartussat suliffiutaasa paasissutissaataanik pissarsisinnaanisaasa qulakkeerneqarnissaat. Tamannalumi Inatsisartut paatsoorneqarsinnaanngitsumik siunertarivaat Inatsisartut 2004 aktieselskabemut tunngatillugu inatsit maannakkut atuuttoq, kiisalu ukiumoortumik naatsorsuuteqarnissamut inatsisit atuutilersimmagit.

Inatsisit taakkua marluk 1. januar 2005-imiit Kalaallit-nunaanni atuutilersinneqarput.

Tamakkua tunngavigalugit Naalakkersuisut apeqquteqaatinik makkunanga apeqquteqarfiginissaat aalajangiussimavara:

1. Namminersornerullutik Oqartussat suliffeqarfiutaasa, aktieselskabit, tamakkiisumik pigisaminni procentip qanoq annertutigisup 2006-imi selskabenut tunngatillugu inatsimmi piunasaqaataasut malillugit paasissutissanik Erhvervs- & Selskabsstyrelemut tunniussaqaarnissaq tamakkiisumik naammassisimavaat?
2. Aktieselskabenut inatsit Kalaallit-nunaannut atuuttoq tunngavigalugu suliffeqarfiit aktieselskabit naalagaaffimmit kiisalu Namminersornerullutik Oqartussanit pigineqartut siulersuisui pisussaaffilerneqarnikuupput suliffeqarfinni aktieselskabenit naalagaaffimmit kiisalu Namminersornerullutik Oqartussanit pigineqartunut tunngatillugu aktieselskabinut inatsimmi kiisalu ukiumoortumik naatsorsuuteqarnermut inatsimmi aalajangersakkanik malinninnissamik qularnaarinissaq siunertaralugu siulersuisuuffimmini maleruagassanik pilersitsinissaq isumagissagaat. Inatsimmi pisussaaffiit aalajangersarneqarsimasut unioqqutikkaanni akiliisitaanermik pineqaatissinneqarnermik kinguneqartinneqassaaq. Suliffeqarfiit aktieselskabit siulersuisuisa Namminersornerullutik Oqartussanit tamakkiisumik pigineqartuni qassit, procentinngorlugu, 1/8 2007-imi suliffeqarfiit aktieselskabit aktieselskabit pillugit inatsimmi immikkut ittumik aalajangersarneqarsimasut kiisalu ukiumoortumik naatsorsuutinut tunngatillugu inatsisip malinneqarnissaa qularnaarniarlugu maleruagassanik pilersitsisimappat?



3. Suliffeqarfiit aktieselskabit Namminersornerullutik Oqartussanit tamakkiisumik pigineqartut arlaata 2006-imi ukiumoortumik naatsorsuutitut inatsimmi atuuttumi ukiup affaanut naatsorsuosiornissamik piunasaqaatinik unioqqutitsisoqarsimavaa?
4. Naalakkersuisut pisortaqaarfiillu suliffeqarfiit aktieselskabit Namminersornerullutik Oqartussanit pigineqartut selskabit pillugit inatsisini piunasaqaatinik malinninnginnerinik qanoq si-visitigisumik ilisimannereersimappat?
5. Suliffeqarfiit aktieselskabit Namminersornerullutik Oqartussat selskabit pillugit inatsimmik malinninngitsut Naalakkersuisut pisortaqaarfiisalu saaffigisarnikuuvaat, piunasaqaatigalugulu inatsisunik malinnissasut? Tamannalu pisimappat taava qanga tamanna pisimava?
6. AG-p 7. august allaaserisaani Naalakkersuisut Siulersuisoqarnermut allattoqarfiani atorfilik suliffeqarfiit selskabit Namminersornerullutik Oqartussanit pigineqartut paasisutissaataanik Erhvervs- & Selskabstyreelse aqqutigalugu kikkunnilluunniit qaqugu takuneqarsinnaalernissaat pillugu apeqquteqaammut atatillugu akissuteqarnermini ima oqaaseqarpoq: *“Aap im-maqa ukiup nikinnerani”* Naalakkersuisut isumaqarpat, suliffeqarfiit selskabit Namminersornerullutik Oqartussanit pigineqartut inatsisunik atuuttunik malinnilernissaat ukiup nikinnissaata tungaasut utaqqisinneqassasoq?

Apeqquteqaatit tiguneranniit ullut suliffiit qulit qaangiutsinnagit akissuteqaatit tigunissaat kissaatigaara.